

Tukar kompleks komersial terbiar jadi rumah perantau muda

Kuala Lumpur: Bangunan komersial terbiar dan kosong dalam ibu kota akan ditransformasi sebagai perumahan mikro bagi menampung keperluan warga kota, terutama golongan muda atau lepasan universiti bekerja di Lembah Klang.

Datuk Bandar Kuala Lumpur, Datuk Seri Dr Maimunah Mohd Sharif, berkata kaedah itu dilihat membantu anak muda berhijrah ke ibu kota dalam aspek kediaman untuk memulakan kehidupan.

“Sudah dua minggu ini, saya berjalan di Kuala Lumpur, saya dapati ada bangunan lama kosong, kenapa tidak kita tukar kepada perumahan di dalam bandar?”

“Mereka baharu habis pengajian dan keluar universiti, belum berkahwin, tidak perlu rumah besar untuk memulakan kehidupan di sini,” katanya dalam program Podcast BH, Borak Harini: *Kuala Lumpur di Tangan Maimunah*, baru-bari ini.

Pada masa sama, Maimunah berkata, pihaknya mahu Kuala Lumpur dilihat penghuninya sebagai tempat bukan sahaja untuk bekerja, tetapi juga rumah untuk didiami dan melakukan rekreasi.

Atas dasar itu, beliau mahu mereka yang bekerja di ibu kota supaya menetap di sini kerana dengan cara itu mengurangkan kesesakan, sekali gus memberi kesan kepada usaha mengurangkan pelepasan karbon.

Dalam perkembangan sama, Maimunah berkata, bagi meningkatkan aspek kediaman di ibu kota, pihaknya mengenal pasti 139 lokasi untuk dimasukkan dalam program ‘pemuliharaan semula bandar’.

Beliau berkata, melalui program itu, kediaman usang akan dibaiki atau dibina semula, selain konsep komuniti serta kejiranan diperkasakan.

“Saya melihat ada lagi keper-

luan untuk (pembangunan) perumahan kalau kita lihat dari segi penduduknya kini mencecah lapan juta orang, namun perlu melihat kepada rekaan perancangannya.

“Walaupun rumah berkonsep unit bertingkat, masih ada ruang untuk berekreasi, berjalan dan paling penting kehijauan itu masih ada. Ini penting sebagai mengisi ‘roh’ warga kota,” katanya.

Sementara itu, dalam perkembangan berkaitan susulan tragedi lubang jerlus di Jalan Masjid India, Maimunah menegaskan Kuala Lumpur selamat untuk diduduki dan dikunjungi pelancong.

Beliau berkata, melalui kajian pasukan petugas dibentuk, termasuk membabitkan pakar geologi di kawasan tanah jerlus, belum ada penemuan batu kapur di kedalaman 45 meter bawah tanah.

Namun katanya, susulan insiden pada 23 Ogos lalu, pemantauan secara berkala akan dilaksanakan di tempat awam.

Mengulas mengenai harapannya terhadap Kuala Lumpur, Maimunah berkata, beliau mahu memastikan penduduk menetap di ibu kota merasai kesejahteraan di ibu kota sepanjang ditadbir beliau.

Katanya, itu adalah legasi mahu ditinggalkannya, selain menjadikan Kuala Lumpur sebagai bandar raya cemerlang, berdaya huni dan dicintai.

“Saya mahu apabila mereka jumpa saya, mereka sangat gembira duduk di Kuala Lumpur kerana kesejahteraannya. Bantu dan sokong saya menjalankan peranan sebagai Datuk Bandar.

“Pembabitan orang ramai, pelabur, institusi pengajian, wanita dan golongan muda amat penting untuk sama-sama menjadikan Kuala Lumpur sebagai bandar global di rantau ASEAN,” katanya.



Pemuliharaan semula bangunan lama di sekitar Kuala Lumpur mampu menjadi tarikan pelancong.